

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	1 / 9
------------------------	--	-------



## SURUHANJAYA KOPERASI MALAYSIA

---

### GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19

---

#### TUJUAN

Garis Panduan ini dikeluarkan di bawah seksyen 86B Akta Koperasi 1993 [*Akta*] sebagai panduan kepada koperasi untuk mengurus dan mengendalikan Mesyuarat Agung Wilayah atau Mesyuarat Agung Kawasan koperasi menurut seksyen 37 Akta semasa penularan pandemik Covid-19.

#### TAFSIRAN

Dalam tatacara ini, melainkan jika konteksnya menghendaki makna yang lain:

“Mesyuarat Agung Wilayah atau Mesyuarat Agung Kawasan (MAK)” ertinya pelaksanaan mesyuarat agung wilayah atau kawasan koperasi di bawah seksyen 37 Akta dan peraturan 17 Peraturan-Peraturan Koperasi 2010;

“*Hybrid*” ertinya kaedah pelaksanaan MAK secara gabungan di antara maya dan mesyuarat secara fizikal dengan kehadiran anggota. Mesyuarat yang sama juga disiarkan dalam talian dan anggota diberi pilihan untuk mengambil bahagian dalam mesyuarat dari jarak jauh atau dalam talian;

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	2 / 9
------------------------	--	-------

“Perintah Kawalan Pergerakan (PKP)” ertinya perintah kawalan pergerakan yang dibuat di bawah Akta Pencegahan dan Pengawalan Penyakit Berjangkit 1988 dan Akta Polis 1967;

“*Virtual*” ertinya pelaksanaan MAK secara maya sepenuhnya iaitu dalam talian tanpa melibatkan tempat pertemuan fizikal Lembaga, pengurusan dan anggota koperasi. Lokasi dalam melaksanakan MAK secara maya sepenuhnya hanyalah tempat penyiaran atau *broadcast venue*;

“*Broadcast venue*” ertinya tempat penyiaran yang dihadiri oleh pengerusi MAK secara fizikal dan individu lain bagi memastikan mesyuarat agung yang diadakan secara maya sepenuhnya dapat dijalankan dengan lancar.

## LATAR BELAKANG

2. Seksyen 37(a) Akta menetapkan seperti berikut:

**“37. Mesyuarat agung perwakilan.**

*Melainkan jika Suruhanjaya menentukan selainnya, tiap-tiap koperasi yang kawasan operasinya meliputi satu Negeri, meliputi dua Negeri atau lebih atau meliputi seluruh Malaysia hendaklah membuat undang-undang kecil yang memperuntukkan bahawa perwakilan di mesyuarat agungnya hendaklah –*

*(a) melalui perwakilan yang dipilih oleh anggota-anggota individu pada mesyuarat agung wilayah atau kawasan mereka.”*

3. Berikutan daripada pengisytiharan oleh Pertubuhan Kesihatan Dunia (WHO) berkenaan pandemik Covid-19 pada 12 Mac 2020, beberapa arahan telah dikeluarkan oleh Kerajaan supaya semua perhimpunan termasuk segala mesyuarat ditangguhkan atau dibatalkan bagi suatu tempoh tertentu sebagai langkah pencegahan penularan wabak ini.

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	3 / 9
------------------------	--	-------

4. Mengambil kira Perintah Kawalan Pergerakan yang dilaksanakan oleh Kerajaan melalui Majlis Keselamatan Negara, Suruhanjaya Koperasi Malaysia (Suruhanjaya) sebagai sebuah badan kawal selia dan pembangunan koperasi di negara ini turut mengeluarkan Operasi Standard Prosedur (SOP) Mesyuarat Agung Tahunan/Kawasan/Khas/Permulaan Gerakan Koperasi untuk digunakan oleh koperasi dalam perjalanan mesyuarat agungnya.

5. Garis panduan ini merupakan suatu kaedah pengendalian MAK semasa penularan pandemik Covid-19 bagi memastikan inisiatif Kerajaan untuk meneruskan usaha menangani penularan pandemik Covid-19 ini berjaya.

### **PERANAN MESYUARAT AGUNG WILAYAH ATAU KAWASAN KOPERASI**

6. MAK merupakan forum bagi anggota koperasi di kawasan untuk mengetahui dan menilai pengurusan dan prestasi koperasi sejak setahun yang lalu. Anggota koperasi juga boleh menegur, mengawal dan mengambil tindakan yang perlu jika wujud sebarang kelemahan, kesalahan, pertikaian dan penyelewengan dalam koperasi. Bagi maksud seksyen 37 Akta dan tertakluk kepada Undang-undang Kecil Koperasi, Lembaga boleh menentukan kawasan mesyuarat dan memanggil satu mesyuarat agung di tiap-tiap kawasan untuk memilih perwakilan ke mesyuarat agung perwakilan. Lembaga juga boleh menentukan bilangan anggota bagi setiap kawasan dan bilangan perwakilan daripada kawasan tersebut untuk mengambil bahagian dalam mesyuarat agung tahunan.

7. Subseksyen 39(1) Akta mengkehendaki setiap koperasi mengadakan mesyuarat agung tahunan dalam tempoh enam bulan selepas berakhirnya tahun kewangan. Bagi membendung penularan pandemik Covid-19, semua koperasi diberikan pengecualian di bawah subseksyen 87(1) Akta daripada mengadakan mesyuarat agung tahunan anggota atau perwakilannya menurut subseksyen 39(1) Akta semasa tempoh dari 18 Mac 2020 hingga 31 Disember 2020. Walau apa pun, koperasi masih tertakluk kepada subseksyen 39(1) Akta untuk mengadakan mesyuarat agung tahunan dalam tahun kalendar 2021. Oleh itu, koperasi dibenarkan untuk mengadakan dan mengendalikan MAT dalam tahun 2021 sama ada secara *virtual*, *hybrid* atau fizikal

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	4 / 9
------------------------	--	-------

selaras dengan Peraturan-Peraturan Koperasi 2010, Undang-undang Kecil Koperasi dan Panduan Am.

8. Bagi pelaksanaan MAK secara *virtual* atau *hybrid*, koperasi hendaklah memastikan semua infrastruktur penggunaan teknologi adalah stabil dan *user friendly* tanpa sebarang gangguan. Anggota juga hendaklah bertanggungjawab dalam memastikan infrastruktur mesyuarat dalam talian berkeadaan yang baik sekiranya mereka memilih untuk hadir mesyuarat agung secara maya.

### **PERSIAPAN SEBELUM MESYUARAT AGUNG WILAYAH ATAU KAWASAN**

9. Lembaga koperasi pada amnya bertanggungjawab atas semua urusan MAK. Antara tindakan yang perlu diambil adalah seperti berikut:

**(a) Notis Mesyuarat Agung Wilayah atau Kawasan**

Koperasi hendaklah mengeluarkan notis MAK sekurang - kurangnya 15 hari sebelum tarikh mesyuarat agung. Koperasi hendaklah menyatakan kaedah pelaksanaan mesyuarat agung sekiranya diadakan secara *virtual* atau *hybrid*. Koperasi dibenarkan untuk mengeluarkan notis MAK secara elektronik kepada anggotanya. Bagi pelaksanaan MAK dengan kaedah *virtual*, notis mesti menyatakan *broadcast venue* sebagai tempat mesyuarat. Di samping itu, notis hendaklah memaklumkan platform dalam talian yang digunakan untuk MAK bagi memastikan anggota mempunyai akses melalui pautan kepada mesyuarat tersebut. Koperasi diingatkan supaya memberi panduan kepada anggotanya mengenai syarat dan kaedah untuk mengambil bahagian dalam MAK menggunakan platform dalam talian yang dipilih.

**(b) Usul Mesyuarat Agung Wilayah atau Kawasan**

Anggota boleh mengemukakan apa-apa usul sebelum MAK diadakan dalam tempoh dan kaedah yang ditetapkan oleh koperasi, sama ada melalui elektronik atau pos. Usul hendaklah dikemukakan kepada Koperasi selewat-lewatnya tujuh (7) hari sebelum MAK.

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	5 / 9
------------------------	--	-------

## **MEMULAKAN MESYUARAT AGUNG WILAYAH ATAU KAWASAN**

### **Kuorum Mesyuarat Agung Wilayah atau Kawasan Koperasi**

10. Koperasi hendaklah memastikan bahawa kehadiran anggota koperasi ke MAK yang diadakan menepati kuorum seperti yang dinyatakan di bawah Undang-undang Kecil Koperasi. Anggota koperasi yang menghadiri mesyuarat agung secara *virtual* atau *hybrid* tetap dianggap sebagai sebahagian daripada kuorum MAK. Sesuatu MAK yang tidak boleh diteruskan kerana tidak cukup kuorum pada tarikh yang ditetapkan hendaklah, ditangguhkan ke tarikh lain.

11. Bagi MAK yang dikendalikan secara *virtual* atau *hybrid* yang melibatkan penyertaan anggota dalam talian, kuorum mesyuarat boleh ditentukan melalui bilangan anggota yang *log* masuk pada awal mesyuarat. Namun, koperasi hendaklah menggalakkan anggota dapat mengambil bahagian sepenuhnya sehingga ke hujung mesyuarat. Petugas khas hendaklah dilantik mencatat kehadiran anggota yang hadir dalam mesyuarat.

## **SEMASA MESYUARAT AGUNG WILAYAH ATAU KAWASAN DILAKSANAKAN**

### **Pengundian Mesyuarat Agung Wilayah atau Kawasan Koperasi**

12. Bagi MAK dikendalikan secara *virtual* atau *hybrid* yang melibatkan penyertaan anggota dalam talian, proses pengundian dalam talian boleh dilaksanakan dimana anggota memberikan undian dalam jangkamasa/waktu yang ditentukan mengikut agenda ditetapkan semasa mesyuarat diadakan. Kaedah pengundian hendaklah ditetapkan oleh koperasi dan dimaklumkan terlebih dahulu kepada semua anggota yang menyertai mesyuarat tersebut.

13. Bagi koperasi yang bercadang untuk mengadakan undian suara, mekanisme yang sesuai mengenai perkara ini hendaklah disediakan dan melantik pemeriksa bagi tujuan pengesahan ke atas undian tersebut.

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	6 / 9
------------------------	--	-------

## Pengendalian Pengurusan Mesyuarat Agung Wilayah atau Kawasan Koperasi

### Kaedah *Virtual*

14. Koperasi yang melaksanakan MAK secara *virtual* dikehendaki mematuhi keperluan minimum berikut:

- (a) Mengeluarkan dokumentasi diperlukan untuk menyokong perjalanan anggota ke *broadcast venue*;
- (b) Memastikan mesyuarat dijalankan dengan kuorum yang mencukupi; dan
- (c) Memastikan anggota mengambil bahagian dalam mesyuarat yang dilaksanakan secara dalam talian.

Dalam hal ini, kebenaran daripada Suruhanjaya tidak diperlukan bagi anggota untuk hadir ke mana-mana *broadcast venue* yang ditentukan oleh koperasi.

15. Disamping itu, koperasi hendaklah memastikan perkara berikut disediakan —

- (a) Teknologi digunapakai mampu menyokong pelaksanaan hak anggota untuk bersuara dan mengundi;
- (b) Lokasi *broadcast venue* hendaklah di dalam Malaysia; dan
- (c) Pengerusi mesyuarat boleh berada di *broadcast venue* atau mengendalikan mesyuarat secara dalam talian.

16. Dalam pelaksanaan MAK secara *virtual*, Koperasi hendaklah mengambil tindakan berikut-

- (a) memastikan terdapat infrastruktur yang bersesuaian dan selamat untuk membolehkan pelaksanaan mesyuarat termasuk kemudahan bagi anggota menggunakan hak mereka untuk bersuara dan memilih di mesyuarat itu; memberi panduan kepada anggota mengenai syarat dan kaedah menyertai mesyuarat menggunakan platform yang dipilih;
- (b) mengenal pasti *broadcast venue*;
- (c) hanya anggota yang layak dibenarkan untuk mengambil bahagian dalam mesyuarat; dan
- (d) mematuhi arahan, keselamatan dan keperluan pencegahan yang ditetapkan oleh Kerajaan, Kementerian Kesihatan Malaysia, Majlis

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	7 / 9
------------------------	--	-------

Keselamatan Negara, dan pihak berkuasa lain yang berkaitan untuk mengekang penularan pandemik Covid-19.

17. Koperasi disyorkan untuk membekalkan anggota dengan nombor hubungan khusus dan/atau e-mel untuk mengemukakan pertanyaan atau meminta bantuan teknikal untuk mengambil bahagian dalam MAK secara *virtual*.

### **Kaedah Hybrid**

18. MAK secara *hybrid* diadakan di tempat mesyuarat secara fizikal dengan kehadiran anggota. Mesyuarat yang sama juga disiarkan secara dalam talian dan anggota diberi pilihan untuk mengambil bahagian samada secara bersemuka atau dalam talian. Koperasi dikehendaki mematuhi keperluan minimum seperti berikut:

- (a) memastikan terdapat infrastruktur yang bersesuaian serta selamat untuk membolehkan pelaksanaan mesyuarat secara *hybrid* dilaksanakan termasuk anggota mempunyai hak untuk bersuara dan mengundi dalam mesyuarat itu;
- (b) memberi panduan kepada anggota mengenai syarat dan kaedah menyertai mesyuarat dengan menggunakan platform yang disediakan;
- (c) memastikan bahawa hanya anggota yang layak dapat hadir dan mengambil bahagian dalam mesyuarat;
- (d) anggota yang ingin hadir secara fizikal di tempat mesyuarat dikehendaki membuat pendaftaran menjelang mesyuarat serta mengikuti arahan koperasi terutama dalam pengaturan yang diperlukan termasuk berkaitan dengan logistik;
- (e) menentukan sama ada tempat mesyuarat tambahan diperlukan menampung anggota mesyuarat; dan
- (f) mematuhi arahan, keselamatan dan pencegahan yang ditetapkan oleh Kerajaan, Kementerian Kesihatan, Majlis Keselamatan Negara dan pihak berkuasa lain yang relevan untuk mengekang penularan pandemik Covid-19.

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	8 / 9
------------------------	--	-------

19. Koperasi hendaklah mengenalpasti mana-mana Lembaga dan pihak pengurusan untuk menghadiri mesyuarat sama ada secara bersemuka atau dalam talian. Namun, pengerusi mesyuarat hendaklah hadir secara fizikal di tempat mesyuarat pada sepanjang masa mesyuarat diadakan. Begitu juga koperasi hendaklah mengenalpasti mana-mana individu untuk berada di *broadcast venue* bagi menjayakan MAK secara *virtual*. *Broadcast venue* tersebut hendaklah mengambil kira pematuhan kepada Operasi Standard Prosedur (SOP) dan penjarakan fizikal anggota yang hadir. Anggota yang terlibat di dalam mesyuarat agung wilayah atau kawasan secara maya sepenuhnya akan mengambil bahagian dalam mesyuarat tersebut melalui capaian audio dan/atau video.

20. MAK secara fizikal dijalankan di tempat pertemuan bersemuka sahaja tanpa penglibatan daripada mana-mana anggota secara dalam talian. Jumlah anggota yang hadir secara fizikal di tempat perjumpaan bergantung kepada:

- (a) keluasan tempat;
- (b) kemampuan anggota untuk mengekalkan fizikal jarak sekurang- kurangnya satu (1) meter atau jarak yang ditentukan dari semasa ke semasa; dan
- (c) mematuhi arahan, keselamatan dan keperluan pencegahan termasuk Operasi Standard Prosedur (SOP) seperti yang ditentukan oleh Kerajaan, Kementerian Kesihatan Malaysia, Majlis Keselamatan Negara dan pihak berkuasa lain yang berkaitan untuk mengekang penularan Covid -19.

21. Pelaksanaan MAK sama ada secara *virtual*, *hybrid* atau fizikal, hak anggota untuk bercakap tidak terhad kepada komunikasi lisan sahaja iaitu dengan menggunakan suara. Hak berkomunikasi turut merangkumi mod ekspresi lain seperti taipan teks. Walau bagaimanapun, semua mod komunikasi mesti dinyatakan dengan jelas sebagai boleh diterima oleh koperasi semasa kaedah mesyuarat dinyatakan. Perkara ini adalah untuk memastikan bahawa sekiranya berlaku kesalahan teknikal dalam mod komunikasi utama, ianya boleh diaplikasikan dengan menggunakan kaedah lain yang ditetapkan. Berkaitan dengan taipan teks, koperasi disarankan untuk memaparkan soalan dan komen yang diajukan oleh anggota semasa mesyuarat

SKM – BSP / e-REG / GP	GP14B: GARIS PANDUAN PENGURUSAN MESYUARAT AGUNG WILAYAH ATAU MESYUARAT AGUNG KAWASAN KOPERASI SEMASA PENULARAN PANDEMIK COVID-19	9 / 9
------------------------	--	-------

supaya dapat dilihat oleh semua anggota mesyuarat.

22. Bagi kesemua kaedah pelaksanaan MAK sama ada secara *virtual*, *hybrid* atau fizikal, koperasi perlu membentang, membincang dan meluluskan kesemua agenda sebagaimana yang ditetapkan dalam Peraturan- Peraturan Koperasi 2010 dan Undang-undang Kecil Koperasi. Koperasi diingatkan untuk memastikan prosiding mesyuarat dan ketetapan yang diluluskan dalam mesyuarat dicatat dengan betul. Koperasi juga digalakkan untuk merakam (video dan rakaman audio) perjalanan mesyuarat bagi mengatasi sebarang perkara berbangkit.

### **PEMAKAIAN**

23. Garis Panduan Pengurusan Mesyuarat Agung Kawasan Koperasi Semasa Penularan Pandemik Covid-19 digunapakai untuk koperasi bagi penganjuran MAK dalam tempoh apa-apa perintah kawalan pergerakan yang dikuatkuasakan oleh Kerajaan dari semasa ke semasa.

24. Pelaksanaan MAK adalah selaras dengan kehendak Akta Koperasi 1993, Peraturan-Peraturan Koperasi 2010 dan Undang-undang Kecil Koperasi.

25. Suruhanjaya boleh meminda mana-mana klausa di dalam garis panduan ini selaras dengan keperluan semasa.

26. Garis panduan ini dikuatkuasakan pemakaiannya pada tarikh ianya dikeluarkan.

**“PRIHATIN RAKYAT: DARURAT MEMERANGI COVID-19”**  
**“BERKHIDMAT UNTUK NEGARA”**

**(HAJI ZAZALI BIN HARON)**  
Timbalan Pengerusi Eksekutif  
Suruhanjaya Koperasi Malaysia

Tarikh : 23 Jun 2021

**“Peneraju Kecemerlangan Koperasi”**